



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :

Tir Yimiyim

tiryimiyim@aolima

tir yimiyim

TAPAK 7

Tekeraba nung sorkar tentetsü atema Sudan mitkari molunger

State temi totzö saru ajemtsü atema Centre-i GST agütsüsüla: Sharad Pawar



VOL. XIX ONO. 29 (ADOK 29) DIMAPUR KÜPTOKNÜ (SATURDAY) YIMPOKSÜI (NOVEMBER) 06, 2021

₹ 5.00

Nagaland-Assam arrtsü atema senden amentsü

Dimapur, November 5, 2021 (TYO): Nagaland Chief Minister aser Nagaland-Assam arrtsü tebilemstü atema Assembly indang Select Committee convenor Neiphiu Rio-i November 22, 2021 nü senden ka amentsü ayongzükogo.

Sendenji anepdang 10:30 ako nung Nagaland legislative

Assembly Secretariat, Kohima indang Committee Hall nung amentsü, ta Commissioner & Secretary Dr. P.J Antony-i tanü sangdong ka nung ashi.

Iba senden nung Select Committee to Examine the Nagaland-Assam Border Issue züngsem ajak adentsü mepishir, ta Dr. P.J Antony-isa ashi.

Nov 20 nungi Dec 5 tashi UGC NET tatidang agitsü

Guwahati, November 5, 2021 (Agencies): University Grants Commission (UGC) indang National Eligibility Test (NET) tatidang November 20 nungi December 5 tashi agitsü, ta National Testing Agency (NTA)-i metetdaksüogo.

Tanbo December 2020 aser June 2021 semester anaprong indang tatidang külemi agitsü aser NTA-i yakta admit cards

sayatsü. Kaketshirtemi UGC indang official website nungi admit cards download asütsü lenmang lapoktsütsü.

NTA-isa kaketshirtem yaritsü atema helpline number 011-40759000 agütsüogo.

UGC NET tatidangji November 21, 22, 24, 25, 26, 29, 30 aser December 1, 3, 4 o 5 anogotem agitsü.

UK nung COVID-19 indang mozü agizükogo

London, November 5, 2021 (Agencies): United Kingdom (UK)-i Brihostibarnü antiviral COVID-19 drug Lagevrio (molnupiravir) agizükogo.

COVID-19 puteter nem iba mozü agütsüba ajanga parnok mozü kidang amongtsüsa maküm aser tasüba nungia kümzük aser iba nungji ajemdaker UK-i mozü agizük.

Lagevrio mozü ya Ridgeback Biotherapeutics aser Merck Sharp and Dohme (MSD) ajanga yanglur.

Iba mozü yagi virus mesüka akümba noktanger aser nisung temang nung virus züina moudaktsür.

"Medicines & Healthcare products Regulatory Agency (MHRA)-i Covid atema mezüngbuba antiviral süngjang-molnupiravir agizükba osang angashia pelar. Vaccine temi tenokdangba agütsüba den iba mozü achiba ajanga Covid agi tashii shirangba nungi asenok

kümzüka ayutsü" ta UK Prime Minister Boris Johnson-i metetdaksü.

Lagevrio ya Covid putetli achiba ajanga mapa tajungba inyaker ta clinical trial data ajanga bushitetogo. Iba jagi MHRA-i COVID-19 positive putetba sülen tekaratiba nung aser shirangba yimya ajiteter anogo pungu tsüngda iba mozü achitsü metetdaksüogo.

"Asen linük atema tanü ya otsüsütsü anogo ka lir. Alima nung COVID-19 anema antiviral mozü mezüngbuba agizükba UK lir. Iba ajanga COVID-19 agi shirangertem anepaluba nung temelenshi tulu bentsür arutsü" ta Health & Social Care Secretary, Sajid Javid-ia metetdaksü.

"UK-i temang anepalubaren nung alima len anir. MHRA aser MSD mongin teloktem aser Antivirals Taskforce ajanga iba mozü alizükba atema pelaba metetdaksür" ta Sajid Javid-isa ashi.

State aika nung Petrol & Diesel nung VAT ajemer

New Delhi, November 5, 2021 (Agencies): Centre-i petrol aser diesel nung excise duty ajemba sülen state sorkari aikati Value-Added Tax (VAT) ajemba osang metetdaksüogo.


Centre-i excise duty ajemba sülen state aika nung VAT ajemba ajanga petrol aser diesel jenjang aluogo.

Alima nung crude oil jenjang tasakba akümba ajanga petrol aser diesel jenjang maneni atutsü ta mongin nisungtemi ashir saka tang India nung totzü jenjang ajemba ajanga nübertem aser

shishilebartem anisüngzükur. Diwali amongtsü anogo ka lia Centre-i petrol litre nung Rs 5 aser diesel litre nung Rs 10 excise duty ajemba osang sangoktsü.

Centre-i iba telemetba agiba sülen, state sorkar aikati totzü nung VAT ajema liasü. VAT ajemba state tem- Odisha, Arunachal Pradesh, Madhya Pradesh, Nagaland, Himachal Pradesh, Karnataka, Mizoram, Haryana, Uttar Pradesh, Gujarat aser Bihar. Union Territory 3-Puducherry, Jammu and Kashmir aser Chandigarh.

Europe & Central Asia nung COVID ajanga nisung lakh 5 asütsü: WHO



New Delhi, November 5, 2021 (Agencies): February 2022 tashi nung Europe aser Central Asia nung COVID-19 ajanga nisung 500,000 shi asütsü akok ta World Health Organization (WHO)-i kümdanga alitsü osang metetdaksüogo.

"Yamai dang ora sangküm February ita tashi nung COVID-19 ajanga million tesadang ka shi taküm samatsü akok" ta WHO-isa ashi.

Europe aser Central Asia nung virus kanga menatepba mapang ka nung WHO-i iba tekümdangtsü osang metetdaksüogo.

European Region nung linük 53 nung Covid virus kanga menateper aser iba ya tebilemstü tulu lir. Nisung aika dak COVID-19 puteter, Europe aser central Asia nung Delta variant kanga prokshir, ta WHO-isa ashi.

"Taoba hopta nisung million 1.8 jungnüa dak putet aser nisung

24,000 asü. Europe nung 6% aser central Asia nung 12% agi teimba aküm. Taoba hopta pezü tsüngda Europe nung nisung tasen dak COVID-19 putetbaji 55% agi teimba liasü. Europe ya COVID-19 prokshidak tongti tesem kümogo" ta WHO-i metetdaksü.

"Vaccine magiba aser public health and social measures salaba ajanga kanga menateper" ta Europe atema WHO Regional Director Dr Kluge-isa ashi.

United States, U.K., Portugal aser India linüktem nung nisung aikati vaccine agiba aser immune system tashi itta aliba ajanga 2022 küm tatemlen ka tashi nung Covid wara mali akümtsü, ta WHO-isa metetdaksü.

2022 tatemlen tashi nung alima nütsüng yongsük 70% tashi vaccine agidaksütsü atema WHO-i alizüing yua lir.

COVID-19 Nagaland: 11 dak putet, 19 taneptsü angu & 1 asü

Kohima, November 5, 2021 (TYO): Nagaland nung Hokolbarnü nisung 11 dak COVID-19 putet, 19 taneptsü angu aser nisung ka asü.

"Tanü COVID-19 aliba puteteremji Dimapur nung nisung 9 aser Mokokchung o Phek nung kaka (1) lir" ta Integrated Disease Surveillance Project atema State Nodal Officer, Dr Nyanthung Kikon-isa ashi.

"Tesüiba ghonda 24 tsüngda Covid-19 puteta alir nisung 19 taneptsü angu. Parnokji Dimapur nung 13, Kohima nung 2 aser

Longleng, Mokokchung, Phek o Tuensang nung kaka (1) lir" ta pai ashi.

Nisung 31,905 rongnungi 29,966 taneptsü nguogo aser ibaji taneptsü angur 93.98% lir, ta Dr Kikon-isa ashi.

Tang nisung 185 anepaludar saka parnok 149 dakbo shirangba yimya kecha mali, ta paisa shisem.

Tanü Covid puteta alir ka asüba züngsema tasür ajak agi 688 kümogo.

"Brihostibar tashi nung nisung 713,342 nem COVID-19 vaccine indang dose 12,15,148

agütsüogo" ta State Immunization Officer, Dr Ritu Thurr-isa ashi.

Vaccine agirtemji frontline workers 60,963, healthcare workers 15,998, arishi küm 45 ser temapur 202,782 aser arishi küm 18 nungi 44 tsüngda alir 433,599 lir, ta paisa ashi.

"Vaccine agirtem rongnungi nisung 501,806-i dose anaprong agiogo. Parnokji frontline workers 48,013, healthcare workers 13,329, arishi küm 45 ser temapur 163,284 aser arishi küm 18 nungi 44 tsüngda alir 277,080 lir" ta Dr Thurr-isa ashi.

Nov 16 nungi CBSE tatidang tenzüktsü

New Delhi, November 5, 2021 (Agencies): Central Board of Secondary Education (CBSE)-i November 16, 2021 nungi class 10 aser 12 atema board exams agitsü.

Iba ya term 1 exams alitsü aser MCQ-only format nung dang agitsü. Kaketshirtemi paper nung circles agi telangzüba longbangtsü. CBSE-i OMR sheets ji school tem nem agütsütsü aser OMR sheet shia balaka asütsü, ta CBSE-i metetdaksüogo.

CBSE indang term-1 exams ya minute 90 atema dang agitsü. Term-II exams ji March, April 2022 nung agitsü, ta parnokisa ashi. CBSE INDANG term-II exams ji subjective format nung agitsü aser 'major' subjects atema dang agitsü.

CBSE-i class 12 kaketshirtem atema subjects 114 aser class 10 atema subjects 75 agütsür. CBSE-i major (subjects offered

by all schools) subjects atema dang tatidang agitsü.

"Subject ajak atema tatidang agira, anogo 40-45 tashi agitsüsa akümtsü. Anungji kaketshirtemi angazükba mapang makoksadaksütsü atema CBSE-i 'subjects offered by all schools' atema dang tatidang agitsü" ta CBSE-i sangdong nung metetdaksü.

CBSE-i tatidang agiba yimya melenshiba den külemi inyakyim aika melenshiogo.

Tatidang syllabus indang 50% atema dang agitsü.

MCQ-only format nung dang tatidang agitsü.

Tatidangji Minute 90 (1 hour 30 mins) atema dang agitsü.

Reading time minute 15 nungi 20 melenshir.

Anepdang 10:30 ako nungi masü 11:30 ako nungi ang tatidang tenzüktsü.

Total marks nungi 50% ji

practicals/ internals indang asütsü.

December 23 tashi nung official portal nung practical marks upload asütsü.

CBSE-i term-1 exams nung practicals atema external examiner meshimtsü.

School temi practical atema pei answer book amshitsü.

CBSE-i exam centre shia atema observer kaka shimtsü.

Kaketshir 500 shia atema observer ka alitsü.

Kaketshir 500 tema süra CBSE-i observers 2 yoktsü.

CBSE-i exam centres ajak nung city coordinators shimtsü.

CBSE-i exam centres nem online ajanga OMR sheets agütsütsü.

OMR sheet indang copy ka practice atema school tem dangi yoktsü.

ASTD,CKU & KUDD tsüngda putepa alitsü lemtet



November 05, 2021 nü Dimapur nung Ao Senso Telongjem Dimapur den Khezhakeno Union Dimapur District aser Chiecha Kuda Union (CKU) na külem senden aliba mapang tangokba noksa ka yangi angur.

Dimapur, Nov.05 (TYO) : Telongjem Dimapur (ASTD)-i Tawa October 13 nü Dimapur nung Khezhakeno nung Kevechulo Koza aser Chiechama nung Keneiletuo Zumvü nati Ao kin tetshia Dimapur nung alir Aremchang Imchen tepsetsü merangba dak sendakba ken o lemteptsü atema, Khezhakeno Union Dimapur District KUDD) aser Chiecha Kuda Union (CKU) nati mepishiba ama, tanü Hokolbar nü Ao Senso Telongjem Dimapur (ASTD)-i külem senden ka ayongzüka menogo aser mepelaba ken o ajak süoktepa jembir külen, tang nungi putepa alitsü bangjemogo. Iba senden nung Ao Senso

Telonjem Dimapur (ASTD)-i Aor kin tenüng tetshia Aor tepsetsü merangba mapa anema kanga mepelaba metetdaksü, ajisüaka senden nung adener telok ajaki Kevechulo aser Keneiletuo nati kin tenüng tetshia Aremchang dak tasüküma yiruja azükba anema kanga süoki ia ken o lemteper külen, iba tatalokba maparen ya kin o kin na tsüngda ken o mekümi ajaki mulungba ka nung telemtetba agitsü telemtetba agiogo.

Tanü putu nung tang ama Naga nungertem rongnung yimjung nung putepa alitsü merangba mapang ka nung, nisung yiruja mapa tamajung

inyaktsüba tesemji konga mali, anungji nisung ajaki iba ama tokolok aser temulung maden inyakba mapa tamajung nungi pilaa alitsüla ta tanü iba külem senden nung adener lokti tentet asem telongjem sangdong ka ajanga metetdaksü.

Tarutsü nunga Dimapur district nung külemi lia aotsü alinung, tanü senden nunga adener telok asem tsüngda tembar adianu tsüngda tesendaktep tasen nung putepa liyonga aotsü lemtet aser parnokisa tanga lokti tentet ajak dang Naga nung loktiliba nung tangatettep aser tesendaktep tajungba nung putepa lia aotsü atema külemi sobalibaa aotsü ayongzüka.

Noklak Deputy Commissioner ajanga metetdaksür

Noklak, Yimpoksüi/ November 05, 2021 (TYO): Deputy Commissioner & Vice Chairman DPDB, Noklak, Hiazu Meru-i sangdong ka

Chakhesang Students' Union pur Platinum Jubilee amungtsü



Chakhesang Students' Union küm 75 ajungba benjongmung indang Central Organising Committee züngsemtem November 4, 2021 nü osangbener den jembidang tangokba noksa ka yangi angur.

Kohima, Yimpoksüi/Nov. 05 (TYO): Chakhesang Students' Union (CSU) pur küm 75 ajungba benjongmung taroba küm February ita Phek jila nung "Towards a refined guild" omen nung ajemdaker amungtsü renemshiba mapang lir.

Iba benjongmung amuntsü anogo ano melemtet, saka tariba küm February ita mezüng mesüra tanabuba hopta nung amungtsü, ta Central Organising Committee (COC) Convenor, Mütsikhoyo Yhobu-i Brehostibarnü osangbener senden ka nung ashi.

1947 küm CSU tenzüka mapang Naga nungertem asoshi tongtipang mapang ka liasü, kong Naga nungertem nünjiso

bushiba tsütsü tashi itshiba mapang aser Naga nungertem telung nung alirtem temai adoka nüburtem majurutetba mesüra yakbangi arua parnok tejangraba melemsateptetba mapang ka liasü, aser Naga nungertem nünjiso bushiba maparen nung Naga Students' Federation ama CSU-ia shilem tulu agia aru, ta pai ashi.

Kin balala tebilemstü benoka sabang balala nung jembida rongnung CSU ya mezüngpur liasü aser jenjang balala nung nüburtem ajungtsü atema tongti shilem agia aruogo, ta ashi.

Kaketshirtemi kin ka tejangraba nung ajemdaker inyaker aser lenmang aisü nung khuret balala abener.

Chakhesang nungertem kin ka ama 2021 küm January ita küm 75 ajungba benjong mungogo aser CSU taruba küm amungtsü, ta pai ashi.

Chakhesang nungertem sobaliba khenyongi balaka aliba ya aisü nung asüngtetshitsü nungdak ta ajiteta benjongmung omen "Towards a refined guild" ya shimtet, ta CSU tir, Vetho Vadeo-i ashi.

"Chakhesang nungertem sobaliba khenyongi balaka aika lir aser itemi aisü nung asüngtetshitsü nungdak. CSU tenzüker küm 75 ajungba benjong nung nüburtem asüngtetshitsü maangka angutsü aser agitsü teimla lir," ta paisa ashi.

OFFICE OF THE ST. JOHN SCHOOL CHANGTONGYA TOWN

P.O. CHANGTONGYA TOWN, DIST: MOKOKCHUNG, NAGALAND.

PELASHISHIA JAOKER

St. John School, Changtongya town Silver Jubilee benjong nung tamalen azüngertem (Alumni) aser tsüraburtem ajak den teyaritepertem ajak arua adentsü pelashishia jaoker.

Date : 14th. November, 2021.

Time : 1:30 PM.

Venue : Tzümokkong Church Building.

Sd/-

Planning Committee

Silver Jubilee, St. John School, CTN.

Contact : 87318 19363.

TAI TONGLOKJA ALIR KA OKADAKI ARUTSÜ SANGDONGER

SEE SECTION U/S 82 CR. P. C.

PWD Colony, Dimapur, Nagaland anasa H.No. 12 nung alir Ash Narayan Mahto'er jabaso **Bikash Kumar Mahto** ya **FIR No.50/17, U/S 409/420 IPC, dated 26.03.2017, P.S.Naraina, New Delhi**, ken o nung mapa tamajung inyak sang (mesüra inyak ta temolung melemtet alisang) ta kü matsüngdang ashishitep ken o ka arua liasü, aser iba sülen shia alisang **Bikash Kumar Mahto** ya aputsü totuyuba agüjaka mongutet aser iba nisungba, **Bikash Kumar Mahto** ya jenshia senzür (mesüra shia aliba warrant paidoktsü mechi atsükshir) ta yimya nung ajiteter. Anungji **FIR No. 50/17, U/S 409/420 IPC, dated 26.03.2017, P.S. Naraina, New Delhi** ken o nung tai tonglokja alisang **Bikash Kumar Mahto** ya shia aliba ashishitep ken o nung telangzüba agütsütsü asoshi iba Court matsüngdangi **16.12.2021** tashinung arua nokdaksüla, ta sangdonger.

By Order

Ms. Nupur Gupta,

Metropolitan Magistrate-02,

Room No. 20, Main Building,

Patiala House Court, New Delhi

DP/612/WD/2021(Court Matter)

NSCN/GPRN (R) ajanga Tokhu Emong salem lemsatep

Dimapur, Yimpoksüi/Nov. 05 (TYO): NSCN/GPRN (Reformation) ajanga Lotha Naga nungertem den 'Tokhu Emong' benjong salem lemsatepa liasü, koba November 7 nü amunger.

Tokhu Emong ya Lotha kin asoshi tongtipang benjongmung ka lir, koba alu aruba sülen amunger. Lotha oshi nung Tokhu tetetzü 'lokti chia-ajemba' aser Emong tetetzü 'anisüngzüka' lir aser iba benjongi ashiba ama, aluruwa tembanga iba benjong ya amunger aser alu wadang nung meranga inyakba sülen

nüburtem tashi itshiba mapang ka amai lir, anungji iba benjong nung pelatepa ken atener, tsüngsanger aser lokti chia-ajemer, ta NSCN/GPRN (Reformation) indang MIP sangdong ka ajanga ashi. Naga nungertem kin tejakleni aoba rongnung Lotha nungertem ya ka lir, shirnoki mapa bendanga agütsür nendaka aser meranga inyaker. Item sempet amshia Lotha nungertem adianu aser adianutsürtemi maneni Naga nungertem wadang balala nung ajungmesotsü aser len anitsü teimla lir, ta kasa sangdong ajanga ashi.

Dimapur nung sen lakh 70 jenjang Burma teak apu



Dimapur, Yimpoksüi/Nov. 05 (TYO): Nagaland nung security forces aser state police

temi ozüng alema abenba Burma teak aika pua liasü.

Pua aliba Burma teak ya sen lakh 70 shi jenjang alitsü, ta asadangteta lir.

Iba sung ya Nagaland police aser danga security forces tem lungjemer operation agiba mapang apu, ta osang ka ajanga ashi.

Item Burma teak ya November 2 nung apuba lir, ta

Brehostibarnü sangdong ka ajanga ashi.

Iba dak sendakba nung security forces aser police temi nisung pezü pua lir.

Iba sung ya Dimapur district kübok Pherima nung apu. Truck ana nung ozüng alema Burma teak ya CFT 4500 bener lia Security forces aser Nagaland police ajanga pua liasü.

Pua aliba nisung aser süngpak ya Dimapur nung aliba Forest Range office nem agütsüogo, ta osang ajanga ashi.

Manipur nung Rs 2 crore alang 'Ice drug' apu



Imphal, November 5, 2021

(Agencies): Manipur nung narcotics and affairs of border (NAB) ajanga ozüing alema shibelenba mozü aika puogo.

NAB ketdangsürtemi Rs 2 crores alang 'ice drug' (crystal methamphetamine) ta temolung malemba mozü puogo.

Parnok apuba 'ice drug' ji seret 1 shi lir.

"Myanmar nungi mozüji miima bener aruba ama temolung malemer" ta Manipur chief minister Biren Singh-i ashi.

Iba dak sendakba nung tetsür ka dena nisung pezü puogo.

Manipur police-i ozüing alema mozü shibelenba maparen makdoksü atema mapa inyaker. State sorkari ozüing alema mozü shibelenba aika makdoka arudar, ta Manipur chief minister-isa ashi.

India senso kuli agütsüra temeindokertem nem ali

agütsütsü: Assam sorkari

Guwahati, November 5, 2021 (Agencies): Darrang district kübok Sipajhar nung tawa meindokba kibongtemi parnok India senso ta asüba kuli agütsüra parnok tangalen lidaktsütsü ta Assam sorkari Gauhati High Court dang ashi.

Iba tesem nungi meindokertem lidaktsütsü atema Assam sorkari ali bigha 1000 renema lir.

Ajisüaka, parnok nem temenok kecha magütsütsü kechiyong parnok ya ali atsünga agirtem lir ta Assam sorkarisa ashi.

Atate assembly nung leader of opposition Debabrata Saikia-i Public Interest Litigation (PIL) benokba angadangang Assam sorkari iba telangzükba agütsü.

Dhalpur village nung No 1 & No 3 nung temeindokertem lidaktsütsü atema ali 1,000 bighas (about 134 hectares)

renema lir ta Assam sorkari metetdaksü.

Chief justice Sudhanshu Dhulia aser justice Kakheto Sema na adenba Gauhati High Court bench-i iba ken o December 14 nü angadangsü anogo shimogo.

Assam Congress lennir Debabrata Saikia-i PIL benokba dak alia Gauhati High Court-ia Sipajhar nung tashiyim agi nisungtem meindokba atema suo moto PIL ka benoka lir.

September 23 nü Sipajhar nungi nisungtem meindokba mapang Darrang district administration aser lungkak aiterem raradang tanur ka dena nisung ana police-i khaset.

"Iba ya lendong tulu lir, kanga sasar. Aibelenertem merenshitsuila" ta the Gauhati HC-i ashi.

"Azü tokshio" ta Chief justice Sudhanshu Dhulia-i ashi.

Northeast state tem nung petrol & diesel indang VAT ajemer

Guwahati, November 5, 2021 (Agencies): Centre sorkari totzü jenjang reprangshimtsü shiba sülen Assam sorkari petrol aser diesel nung value-added tax (VAT) ajemogo.

Assam sorkari yakonung nungi petrol aser diesel indang VAT nung Rs 7 ajemogo.

Yakünü Centre-i petrol litre nung Rs 5 aser diesel litre nung Rs 10 excise duty ajema liasü.

Assam sorkar VAT ajemba ajanga Guwahati nung petrol

litre nung Rs 94.46 aser diesel nung Rs 81.7 kümogo.

Maneni, Manipur aser Tripura sorkartemia petrol aser diesel nung VAT Rs 7 ajemogo.

"Manipur sorkari petrol aser diesel nung VAT Rs 7 ajemer" ta Manipur CM N Biren Singh-i ashi.

Tripura CM Biplab Kumar Deb-ia "Narendra Modi-i aniba sorkari petrol aser diesel nung excise duty ajemtsü lemtetba sülen anidaka Tripura sorkari petrol aser diesel nung Rs 7 ajemtsü lemtetogo" ta

metetdaksü.

Mizoram sorkaria petrol aser diesel jenjang ajemogo.

Brihostibar nungi petrol aser diesel litre shia nung Value Added Tax (VAT) Rs. 7 ajemogo ta Chief Minister Zoramthanga-i ashi.

Prime Minister Narendra Modi-i telemtetba tajung agiba ajanga petrol aser diesel nung excise duty ajemogo. Union Finance Minister Nirmala Sitharaman-i iba osang ya state sorkar dang sangoktsü, ta paisa metetdaksü.

Assam nung süngolu kintem asoshi medical menden yutsütsü

Guwahati, November 5, 2021 (Agencies): Assam nung süngolu ayimba kintem atema Assam cabinet-i telemtetba tajung ka agiogo. State-i lapokba medical college nung tea tribes nungi kaketshir nem menden lemkütsütsü.

Cabinet-i MBBS seats 24 aser BDS seats 3 tashi süngolu ayimba kintem nem lemkütsütsü lemtet.

"Süngolu ayimba kintem ya Brahmaputra Valley aser Barak valley nung lir. Parnok ya major estates aser small tea gardens

800 shi nung lir" ta Chief Minister Himanta Biswa Sarma-i ashi.

Brahmaputra Valley nungi süngolu ayimer nem MBBS menden 18 aser Barak Valley nungi kaketshirtem atema menden 6 lemkütsüogogo. Ano, BDS mendenji Brahmaputra Valley atema 2 aser Barak Valley atema 1 lemkütsüogogo.

Cabinet-isa land allotment certificate melentsü molunga agizükogogo. Yimtsüngtem nung periodic 'patta' (title deed to a property) anguba sülen küm

asem tsüngda iba mapa ya inyaksü akok.

Assam cabinet-isa priests aser 'namghorias' nem khen atema Rs 15,000 agütsütsü lemtetogo.

COVID-19 wara ajanga kongshiba tangalen nungi aayangi arur nem dry ration agütsütsü atema Cabinet-i lemtet.

District ketdangsürtemi dry ration lema agütsütsü aser e-shram portal nung tangalen nungi aayangi arurtem osang agütsü.

AO BAPTIST CHURCH PHEK TOWN

Golden Jubilee Celebration



ON 11th -12th Nov' 2021

Omen: "Kibubai ya tashi anir aruogo"
(1Samuel 7:12)

SPEAKER

(Rev. Dr. Prof. Mar Pongener)

Executive secretary

AO BAPTIST AROGO MUNG DANG, IMPUR

TEMETETTSÜ

1. Iba sentong nung Phek Ao Arogopur tang aser tesüiba mapang alirtem aser Anükapang ajak pelashishia jaoker.
2. Tesenteper ajak Covid-19 SOP follow asütsü mepishia metetdaksür.

K. Laldawngliana-i MLA inyaksü tezüngzüktep agiogo

Aizawl, November 5, 2021

(Agencies): Mizoram nung 4-Tuirial (ST) Assembly Constituency indang by-election nung takok angur Pu K. Laldawngliana-i MLA inyaksü tezüngzüktep agiogo.

Hokolbarnep 10:30 ako nung Assembly Annexe building nung Assembly speaker Pu Lalrinliana Sailo-i K. Laldawngliana nem tezüngzüktep agidaktsü.

Iba sentong nung Chief Minister Pu Zoramthanga, Home Minister Pu Lalchamliana, Agriculture Minister Pu C. Lalrinsanga, School Education Minister Pu Lalchandama Ralte, Supply Minister Pu K. Lalrinliana, Sports Minister Pu Robert Romawia Royte aser MLA aika aden.

4-Tuirial (ST) Assembly Constituency by-election nung K. Laldawngliana-i votes 14,561 nungi votes 5,820 nguteta takok angur.



K. Laldawngliana (F/Photo)

Shillong nung Cherry Blossom Festival amongtsü

Guwahati, November 5, 2021 (Agencies): Shillong nung November 25 nungi 27 tashi Cherry Blossom Festival amongtsü.

Küm shia Shillong nung amongba Cherry Blossom Festival nung nisung aika adener.

Ajisüaka, 2020 küm

COVID-19 wara ajanga iba benjung memongtet.

"Cherry Blossom mongpu tatonger aser Shillong Cherry Blossom Festival amongtsü. November 25 nungi 27, 2021 tashi onok den arua mongangma" ta Meghalaya Chief Minister Conrad Sangma-i metetdaksü.



TIR YIMYIM YIMOBILEM (EDITORIAL)

DIMAPUR KÜPTOKNÜ, YIMPOKSÜ (NOVEMBER) 06, 2021

Asenok putepa alitsüla

Tawa Dimapur nung tangar Naga kin ana nungi nisung anati Ao kin tetshia Aor chanu ka tasüküma züker yutsüba tatalokba nungji asenok tebilemdangtsü aser teinyaktsü khuret kar lir. Naga kin ta asüba ya kin tilala aika agi ka kuma longjemba kin ka lir, anungji mapa tajung nunga kin o kin na tokteper aser tamajung nunga kin o kin na arishitepba tatalokba aika lir. Aji oda, Naga nunger asoshi tebilemstü kaji ozü kin aser nür kin ta pei ajung asaa dang bilemba shisatsü tila aser tamajung ya asütsü. Alima nung nisung o nisung na meputep adokba aser raratepbaji kecha balaka tesümgangtsü mali, alima yimya ka dang lir, saka kodang kin ka chanui kin ka tenümg tetshia mezügmeshia jembidir mesüra teka sangshidir, ajibo nisung o nisung na tsümgda masü saka kin o kin na tsümgda temulung yiruteptsüsa akümer aser iba ama mebilemdang aser mekümdang jembiba aser inyakba agi kin o kin na tsümgda meputep adoka reratepdaktsür. Naga nunger rongnung Tsümgremi ajak asoshi moatsüba agi, Ao kin nem tama Yisu temeim aser taochi osang tajung agütsü aser azümg zülü angazükdaktsü. Ibayongji, tangar tashitemetetter libaliro meteta Naga nunger tangar kintem dang tama Aotsür Aor tama Tsümgrem temeim angatetba aser zümgashia metetba nung tejakleni ao. Iba temoatsü nung alima tsütsü government mapatem nung Aotsür Aoertemi maongkaa aser khureta tuluba agitsüsa aküm. Iba jagi Nagaland government office-tem nung tsümartem denbo Aotsür Aor teimba ser tenzük. Ajisüaka, tangari tsümartem dakji masü Aotsür Aortem dak tenük merema adok aser Aotsür Aortemiang tangar meyong senmang aser shilem ka rakzuka agir ama bilem. Iba jagi mapang mapang, tesem tesem nung tangar kintemi Ao kin arishiba aser Aotsür Aortem dangbo 'joko Aor mapang süiogo, nenok agishia agiogo, tangbo onok mapang,' ta mezügmeshia jembiba otsüa lir. Tanü Dimapur nung atalokbajia Aor chanu asüba agi mezügmeshia azükba otsü ka lir. Tamajung melen tamajung agütsütsü asoshi masü, saka asenoki asenok jenjang aser khuret angatetsü atema, "Aji kechiba?" ta bilemdangtsübaji asenok Aotsür Aor ajak mapa kumogo. Nisung ka Aotsür mesüra Aor asüba agi tangari yamaji taküma samatsüsa mezügmeshibaji, shitakba agi, Ao kin longjemdak aser asentenshidakji aji asütsüla. Iba ama pei kin tetshia pei nisung dak zübo ketja mezügmeshiba angashia, Dimapur Ao Lanur Telongjemi ola adokbaji junger aser tenümg asangtsü tim. Iba denji ano Ao Senso Telongjem Dimapur purtemi metpur kin ana nungi par senso lokti tentet jaoka tashitsü ken o shir, tang nungi Naga kintem rongnung putepa alitsüsa shiangaia shinga kin anema tenümg metetshitsü aser mapa tamajunga meinyaktsü ken o zümgzüktepa ayubaji Naga nunger ajak putepshiba mapa ka asütsü imlar. Asenok daka tashimait aser tamajung aika lir, anungji iba jagi tangaria mereprangner aser mezügmeshir. Iba denji ano asenok o asenok na tsümgda yariteptsü aser pu semteptsü melen asenok amajok rongsen, konang aser jenjang bushidang arishiteper. Tangarbo oshi ka asüba agi oshi jagi yimtsümg aser kidong balala asüyonga kibong ka chir ama kümdaktsür aser timtem lendong mapanga kati ka metokshii yariteper. Ajisüaka, asenok dak tangari mezügmeshitsüsa aser anua repringtsüsa jakla tamajung ka alibaji, asenoki tasümg dang medoktsür ashi, takümbo toktsür ajener. Iba jagi, taküm alidangbo asenok o asenok na tsükchitepa dang alir saka tasü nübo mangyimtepa amonger. Ashiko, asenokji tasümgang metoktsüba kin asüba agi asütsüsa akok, saka tanübo tasümgang dang masü saka taküma medoktsüba kin ka kuma asenoki asenoksasa yanglutetsüla. Alima nung longjemer inyakba mapa tapu ana lir, kin kari longjemer tangar anema kiralongra mapa tulu inyaker, ajia telongjemsä. Aser ano telongjem ka lir, iba telongjem jagibo longjemer tangar tsübuseta tejenokdak maka shisabolua alirtem nem tejenokdak agütsür, yaa tzüraa alirtem tebok süngtsür, mashimemetetba agi timtema alirtem shisa tenük lapokja yarir. Iba telongjem yagibo tetsübuttsü inyakba telongjem tashi anema inyaker. Iba ama tangar atema tajung inyakba telongjemji asenok telongjem asütsüla. Süra, tangari asenok mezügmeshi masütsü. Aji oda, tangari asen kin mejeteta mezügmeshitsüsa asenok libaliro, inyakyim aser lokti sobaliba nung melili. Asenokbo nisung sür meimtepba aser yaritepba ya dang masü saka asenok taküm lia asenok rongnung timtem lendong atalokdang aser tangari mezügmeshi dang kati ka toktsür mejenli, angashir mangashi aser ngur mangu mekümlü. Iba jagi asenok kin tashi aitsü aser Naga kintem putepa litetsüsa teyari agütsütetsü.

OLEMSABANG

ABAM Sanen Luden lemtet meyipa agitsüla

~ Temsü Aier, Dimapur.

Ao Baptist Arogo Mungdang (ABAM)-i October 29, 2021 nü Molungyimsen Baptist Arogo dangi züluba shidi nung yamai shia lir.

"SLT/2021-130 : Molungyimsen Arogo SQC Sentong:

Molungyimsen Arogo-i par Arogo SQC sentong nung ABAM Executive Secretary shilem agitsü asümgdangba indang mapang agia jembitep. ABAM Sanen Luden lemtet (SLT/2020-07) dak ajemdaker shilem magitsü lemtet." (Ref.:No.AB03A32/2019-20/87, dt. 9/04/2020)

Iba telemtetba nung ajemdaker nenoki asümgdangba ama shilem magitetsü sa akümba osang nenok nem metetdaktsür"

Iba osang angashia kanga aoksar aser ABAM Sanen Luden-i tesüiba ABAM lemtettem alema iba telemtetba agiba angudang temolung mesümgjemetetba agi iba shidi zülur.

Naga lima nung mezümg Khristan Arogo tenzükba otsü atema küm aika atsütepa arur 1986 küm ABAM Special Committee-i kuli-o (document) balala nung ajemdaker oshidang ka agütsüba mungdangi agizük aser iba nung ajemdaker inyaksangshia aruogo. Ajisüaka, tang ABAM Sanen Luden-i ABAM Temzümg (Revised 2016) aser ABAM Nükla 2030 (2016) jeli o nung ajemdaker Molungyimsen Baptist Arogo (150 Jubilee) Sesquicentennial sentong nung ABAM Executive Secretary shilem magitetsü ta ashiba yabo kangasa tim masü aser 1981-1986 ABAM Special Committee zümgsemtem mezügmeshiba inyakyim ka lir.

October 5, 1972 nung ABAM Associate Secretary memo ABAM /ECA- 1/72-73 nung yamai zülua lir: "Molungyimjen arogo tenzükba küm 100 jubileeeji Dr. Clark Record-i tuyuba ama küm agi mabensa nungji ABAM-i shilem magir." Iba tangatetba nung ABAM-i Molungyimjen (Molungkimong) Baptist Arogo Centenary benjung nung shilem magii süiogo.

Ajisüaka, 1997 küm Quasquicentennial benjung amongdangbo ABAM-i 1986 telemtetba nung ajemdaker Molungyimsen aser Molungkimong arogotem nung shilem agia liasü. Taoba ABAM Executive Secretary Rev. Dr. L. Kari Longchar-i anir ABAM nung inyakeremi Molungyimsen Baptist Arogo Quasquicentennial benjungmong nung denogo.

Süra, 2022 küm Molungyimsen Baptist Arogo nung Sesquicentennial sentong nung ABAM Executive Secretary Tsümgrem o jembitsü atema meyoktsü ta ABAM Sanen Luden-i lemtetba ya koba tangatetba nung ajemdaker telemtetba agi? ABAM Sanen Luden-i taoba Executive Secretary Rev. Dr. L. Kari Longchar amala tesüiba mapang ABAM nung inyaka arur aser otsü meteta alir dang danga asümgdangtep asübo tanü iba mangatetep ya madokla ta bilemer.

ABAM ya local arogotemi ter shilem aser temeranger tenla agüja nungita yariba tentet ka lir. Aoli arogo kar tsümgda mepetmesü mesüra mangatetep adokra idangji ABAM-i ochi nung ammeter aser kuli tejangja nung ajemdaker tiyongtsü nung inyaktsüba sernung tanü ABAM ketdangtsürtemi tejak repringa aser arogo bendanga amshiba yabo magizükteper. ABAM-i Tsümgrem o jembitsü atema arogo kar dangibo aotsü saka ano kar dangibo maotsü ta lemteta inyakdi süra, tamangertem aser local arogotemi kechi atema ABAM nem zümgsem saru aser ter shilem o temeranger tenla agüja nungitsü? Yamaisa meshisadangi lemtet agidi süra, Aor Baptist arogotemi ABAM kübok medenli aser arogo shia pei sasa dang ketdangtsüa odi ta ola adok mesora idangji ABAM-i kechi telangzuba agütsütsü? Item tebilemstü ya ABAM-i khen arokaroka shisadangtsüla aser ABAM Sanen Luden-i tesüiba mapang telemtetba agia alibatem aser bushiteta aliba kuli-o tem repringer Oct. 21 - 22, 2021 nung senden amendang lemtetba yabo meyipa agitsüla.

1981-1986 ABAM Special Committee zümgsemtem:

1. Dr. I. Benwati, Shillong
2. Dr. Renthly Keitzar, Jorhat
3. Rev. Imotemjen Aier, Guwahati
4. Tsuknungpenzu, MKG
5. Yarmong, MKG
6. Tsukitoba, Ungma
7. Jangkidong, Merangkong
8. Imnatangit, Chuchu town
9. Temjenkaba, Dibua
10. Imangdangba, Khar
11. Nungsashiba, Longchem
12. Tongpanyuba, Lirmen
13. Rev. Tarepyangba, Longjang
14. Rev. Subongsuba, Mopungchuket
15. L.T. Maja, Impur

1981-1986 ABAM SPECIAL COMMITTEE OSANG:- OKILA :-

1981 ABAM Special committee temalen agüja aliba ken-o atema 1982 nungi 1986 Nov tashi meeting 4 ben amen Molungyimsen arogo nungia jaoka tesüiba mapang Ao Mungdang special committee balalai inyakba. Ao Mungdang Executive committee ajanga Mungdang-i inyakba aser Missionarytemi toktsüba record bilemdanga inyakogo.

Ibai otsuren (history) mapa asu nung, telemtetba telangtet ka mesura hau-nonga o ka dang ashitsu tasak aser tamakoktsu Anungji zülua aliba kuli-o (document) agi kechi tuyu yamaji dang committee-i agutsur. Shitak tai ajak zulu aliba kuli-o-ji (document) jagi ratetsur. Anungji zülua aliba kuli-o-ji (document) committee tebandang o asutsu.

Memetetba mapang tesüiba arogo otsuren meimchir tashi mait ajanga Missionarytem nungi tenzuka arogo aser Ao Mungdang tenzükter tashi inyaka aruba

-16-

mapatem nung teti dangbo tabensa inyaka mali, aji oda aibelena inyaksemba ajiteta aru, tatishitsu agi, 1926 Ao Jubilee Amongji asen lima nung Arogo tenzükba December 23, 1872 nung ajemdaker among masu, saka Molungyimsen akumba kum 1876 nung ajemdaker among ta ajiteter Saka Ao Mungdang Research ajanga bushitetba agi December 23, 1872 ya-ang Ao lima aser Nagaland nung Khristar Arogo tenzükbaji lir

90 BUBA
AO BAPTIST AROGO
MUNG DANG
IMPUR, NAGALAND.
November 4-6 1986.
TELEMTETBA

ADOKTSUR :

OFFICE OF THE EXECUTIVE SECRETARY, ABAM.
Impur, Nagaland.

ZULUA ALIBA KULI-O-TEM (Documents)

(a) Mezümgdang nung Molungkimong yimtak December 23, 1872 nung asen lima (Soil) nung arogo tenzük. Saka kodang Dr. E. W. Clarki anir oa Molungyimsen October 24, 1876 nung yim tasen ka akum, idangji Molungkimong yim tasen ka toktsüba tejangja mangur: aser iba arogo 1892 nung tanben tasen kuma tenzük saka ajia 1898 nung loka aser Molungkimong arogo yabo 1919 nung tenzükba metanglangi aruba arogoji lir. 1940 nung Ao Mungdangi tasümgdangba yokba nung telangzuba agutsüba nung Molungkimong arogo par arogoji 1919 nung tenzük ta langzuba kulji argur.

(b) Tanabuba nung Molungyimsen arogo Molungkimong yimtak December 23 1872 nunggi tenzük ta angateter. October 24, 1876 yabo yim tasen ka Molungyimsen akumba dang lir. December 23 1872 uung tenzükba arogoji amanghapur yim tasen akumdangji bener ait saka arogo takum tamane. mepetmesu kar ajanga iba Arogo August 19, 1894 nung ken loka aser tenzükshi. (19 August, 1894 on Sunday the 19th August 1894). At the morning preaching service was a church meeting and under the instruction of Rev. S. A. Perrine and Haggard, the Molung church disbanded" Sd E. W. Clark (Vide Kijung's collection Naga Mission and church record by E. W. Clark. Further see the Mighty Work of God by F. S. Downs P. 115. Baptist Mission in Nagaland by Joseph Puthen Purakal pp 108-109 etc).

III. TANGATETBA AGUTSÜR :-

Arogo otsu maparen dak sentakba nungi adokba ken o case ama Mungdang mesura kija arogo shingüa mejmibitsü, nungdakra zülua aliba kuli-o (document) bushitetsü akok.

Committee-i osang fener aruba ama Mungdangi agizuka ayu, aser iba ken-o nung Mungdangi kecha shilem (responsible) magitsü ta lemtet.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

ABAM CEM Committee aser lokti telen balala sensaksem kaogo



Mokokchung, Yimpoksüi/ November 05, 2021 (TYO): Hokolbarnü Süngkomen Baptist Arogo Meeting Hall nung ABAM Clean Election Movement (CEM) ajanga ayongzüka ABAM Clean Election Movement Committee aser Lokti Telen balala, Mokokchung Sensaksem kanga takok ngua kaogo, ta Hokolbarnü Executive Secretary ABAM, Rev. Dr. Mar Pongener-i sangdong ka nung metetdaksü.

Iba sensaksem ya Ao Senden, Watsü Mungdang, Ao Kaketshir Mungdang, All Ward Union Mokokchung Town aser Mokokchung Town Lanur Telungjem den agia liasü.

Rev. Dr. Mar Pongener Executive Secretary, ABAM ajanga okilaba mapang nung iba sensaksem ya asenoki temzüng ka lateta yanglutsü asoshi masü, saka asenok ajaki shisatsü bendena sentong balala tarutsü nung külemi agia Election merükteta agitsü nükla nung agir, ta ashi. Paisa, tanü asenoki temelenshi bener arutsü asoshi tanga lenmang aika mali saka, ajaki ochishia election nung shilem agiba ajanga dang lir ta janga jangja ashi.

Ochi inyaksü asoshi pai

Abraham Lincoln-i ashiba O ka bener arua, "Nisungi ochi memelenshitetsü, saka ochi agi dang nisung melenshitetsü," ta asüba nungi ajemdaker pai, asenoki ochi nem yimsü südaksütetra tanü tesempatsü keta agiba election ya asenok asoshi temoatsü mapa ka asütsü, ta akhang akhanga ashi.

Paisa Yohan 8:32 nung ajemdaker, arung, ochi-i dang asenok nüji kümdaktsütsü asünung, taruba election nungiba ochi mapa jungkai adokdakja ainkar ola agüja inyakdi, ta ayongzü.

Rev. Dr. Noklen Convener, ABAM CEM (Pastor, Ungma Baptist Arogo) ajanga asenoki jakdak jakdaka meimchir tashi aser ochimashiba mapa dang ma-a ta meshira tarutsü tia tamajunga asütsü kishizüng nung lir. Anungji, koba tia aser tensa arudir aruaka, tasü itta joko onoki teyazü mapa nung shilem magitsü saka ochishir, Tsüngrem tsübur aser lokti meima inyaksü nisung dang shimtsü ta shidi, ta ayongzü.

Paisa taruba election mapang nungbo Senso Candidate shimba yabo khenyongi maremzüktetsü mapa ka asütsü, ta shisem.

Rev. Dr. Kari Longchar

ajanga tanü aseni ochi mashiba yimsüsüba sorkar anema ola adoktsü atsüayonga melei-i senso ajaki tasü itta mapa tamajungtem aitsüdi aser ochi mashiba lenirtembo onoki magizüker, ta indang indanga shidi ta ayongzü.

Sensaksema mapang nung telen balala nung lenirtemi, parnoka ABAM-i ayongba Election merükteta agitsü sentong nung mapang, nübo aser rongsen ajak agütsütsü mulunga lir ta tasü tait ola agüja liasü. Talisa, Election merükteta agitsü yimyim ya tesem ajak tongtettsüsa talisa lanurtem telok ya kanga tongtibang asü nung parnok nem tangatetba agütsütsüji asenok nükla sür inyakdi, ta tayongmesoba ola aguja liasü.

ABAM ajanga Süngkomen Baptist Arogo dang iba sensaksem asoshi meeting hall melaba den achi-ajemtsü teperi agütsüba asoshi pelaba lemsateper; maneni ABAM ajanga lokti aser kija ajak dang aruya aliba Nagaland Legislative Election mapang nung temelenshi bener arutsü nükla yur külemi ochi mapa inyaka odi ta ayongzü, ta ABAM Executive Secretary-isa metetdaksü.



America nungi Rev. Dr. E.W. Clark Naga limai mezüng Tsüngrem osang tajung bener aruba lenmang, koba Tzürang (Tero) ayong nungi Molungkimong (Dekahaimong) tashi lir, iba lenmang nung November 4, 2021 nü Longmisa Baptist Arogo Youth Ministry nungi lanur 72 tashi "Tracing the Giant Footsteps of Rev. Dr. E.W. Clark" omen nung ajemdaker sarasadema jaja liasü. Iba sülen parnoki Naga lima nung mezüng tzüsen tzübo (Molungkimong) aser ano yimtsüng nung tongtipang tesemtem semdanga sarasadema sentong balala temoatsü nung agia liasü.

ANO GO ABEN TSÜNGREM DEN

Sarasademi Tsüngrem tebilemba meteter

Aser anepdang, sangwatsü mapang talangka lia, Pa shishir, azüngmeyakdaki kati ainshia ao aser yangji sarasadem.

Mark 1:35.

Yisu anepongi sarasademi aoba nütsüngtemi meteta liasü. Kodang parnoki Pa nungdadir Pa sarasademdaki aotsü parnoki metetta liasü. Kodang Yihudai Yisu ashioktsü, pai tsükchirtem Yisu sarasademdagi anir ao.

Mapang shia Yisu Khristai tongtipang telemtetba agidang Pai sarasadem. Kodang Pa dang Tebu inyakyim nung masü, alima inyakyim mapa inyaksü atidang, Pai sarasadem (Matt. 4). Kodang nütsüngtem shimtsü mapang aru, Pai aonung tepiyong sarasadem (Lk. 6:12). Tsüngrem chiri Tebui mulungba metettsü asoshi aonung sarasadem süra, Tebui mulungba tejanga metettsü asoshi asenoki mapang kopika agitsüla?

Aiben Yisu telok tului nungpanga liasü, Tebu ola angashitsü asoshi Pai sarasademdak ka nungdak ta Pai metetta liasü. Yisui lemang melenshitsütsü meranger nisung aika liasü. Pa nütsüngtem Pa telok alidaki odaktsünü (Mark 1:37). Teloki Pa chuba kümdaktsünü (Yohan 6:15).

Satani pa nukjidong melenshitsü atidang (Matt. 4:3,6,9). Yisui Pa missionji telok tulu anidentsüba masü, saka Tebu dang tashi angaa alitsüba ta angatetta liasü. Sarasadem agi Yisu tenzüka mapa asoshi renemtsü (Lk. 6:12). Sayatenya dang tama sarasadem liasü (Yn. 11:42-43); Lendong mapang nung sarasademi pa tasü itdaktsü (Lk. 9:28-31). Sarasademi Pa kangki-i atutsü tashi tasü itta kümdaktsü (Lk. 22:41-42); aser sarasademi timtem arema kangki Pa tanela odaktsü (Lk. 23:46). Kümtetdakba tatishitsü anidakang aser ne kija sarasadem nung Kibuba den mapang agiang aser ne taküm asoshi mapa renemang.

Kohima nung Naga nunger atema Crusade ka ayongzüka agitsü



November 05, 2021 nü Naga Shisha Hoho Prayer Centre, Pruzhie, Kohima nung November 12-14 anogotem nung Naga nunger atema crusade ayongzükertem- Vezokho Vero, Rev. Velavoyi Keyho aser Thungdeno Mozhui nungeri osangbenertem den jembiba sülen tangokba noksa nung angur.

Kohima, Yimpoksüi/ November 05 (TYO): Naga Shisha Hoho Prayer Centre, Pruzhie-i ayongzüka November 12 nungi November 14, 2021 tashi Naga Shisha Hoho, Prayer Centre nung Naga nunger atema crusade tuluka ayongzüka agitsü, ta Hokolbarnü Organizing Committee Convenor, Rev. Velavoyi Keyho-i metetdaksü.

"Saka Kibubai kü dang ashi, ni tanur ka dang ta teshi; kechiyong Ni shir dangi na yokdir na aotsüla, aser kechisa Ni nü dang meladir nai jembitsüla," omen nung ajemdaker iba crusade ayongzüka agitsü.

Hokolbarnep Prayer Centre nung osangbenertem den jembidang Organizing Committee züngsem aser Naga Shisha Hoho, Prayer Centre nung pastor, Pruzhie Vezokho Vero-i, Naga nungertemi Tsüngremi tenyaba mapa nung tamakok nguogo aser rongsen den alima penbuba ajanga Tsüngrem mepelar, ta metetdaksü.

Paisa, Naga nungertemi tatok meshia memelenshira ni tanur ka dang ta teshi; Nalga lima nung memetetba wara aser lendong balala ajurutsü, ibayongji tatok meshitsü aser asentenshitsü atema iba crusade ya ayongzüker, ta metetdaksü.

(Maneni tapak 9 nung...)

OLONG PAITEP # 5988

1				2					3	
						4		5		
6			7							
					8		9			10
11										
12		13						14		
		15								
						16				
	17									
					18					

TIPIEN		LANGTSÜNGLEN	
1. Yakob tetsü - (6)		2. _ _ _ gki - (3)	
4. Mezüng nisung - (4)		3. Telungpur telok ka - (2)	
6. Tasen lai kakat ka - (5)		5. Tsüngremi mezüng pokttdaktsüba - (5)	
9. Au lanu - (2)		7. Tia - (4)	
12. Tejen lai 21 buba - (11)		8. Yakob-er jabaso ka - (5)	
15. Tekolak tembar - (2)		10. Abraham tebutsu - (4)	
16. Zütsüra anepsang - (5)		11. Rebeka kinungpu - (4)	
17. Kain tenu - (4)		13. Esau tenu - (5)	
18. Hana-er jabaso - (6)		14. Tzünglu tilala aru - (4)	
		16. Jafet tebu - (3)	
		17. Teka agi kongshi - (2)	

OLONG PAITEP # 5987 TELANGZÜBA

TIPIEN :	LANGTSÜNGLEN :
2. Pongsen, 5. Lepko, 7. Omen, 8. Maangka, 10. Yangkhu, 12. Senpong, 14. Angu, 15. Raksa, 16. Arameso,	1. Alimang, 2. Pongen, 3. Samaru, 4. Nün, 6. Pio, 9. Nüngdak, 10. Yongya, 11. Kongro, 13. Ora, 14. Ata.



ALOKBA DOCTOR'S CLINIC NUNG :

Doctor : Arree, oko Alok, ya kechi asü? Nü temang ajunga oksar, tepen tereta süktanger amaa ya, komasür yamai yiru?

Alokba : Ozü tantsü mechi nungako ya.

Doctor : Wa, lai yamai sashia nü dak azük asü?

Alokba : Masü, la mejanga or ya pungmang nungsa o tapu tapu jembia mangpur aja.

Doctor : Koma atalok?

Alokba : Yasüng küna prong mejanga lia lai tashi agi dang" Darling, kübuba arudar yakta window jagi pongzüka jenang" ta ashiji ni kecha mepilemdangi window nungjagi pongzüka yamai ang sayangtet ati.

Doctor : Oh Alokba!!

Lilir : WhatsApp

TANÜBO NAI LANGZÜANG

Q. Prime Minister's Economic advisory council (EAC-PM) indang Chairman ji shiba?

[A] Bibek Debroy [B] Rakesh Mohan
[C] Poonam Gupta [D] T T Ram Mohan

(Taruba adok nung onoki langzüksü)

YASHI ADOK TELANGZÜBA : Ministry of Electronics and IT

AO OSHI ANGAZÜKDAK:
TANÜ ANGAZÜKTSÜBA OJANG

Lenkübok
(n) Lenmang tsünglang (below the road)
* **Lenkübok** nungi keyi ka adok.

Lenkümbang
(n) lenmang temalen (above the road)
* **Lenkümbang** nungi anentsü alu.

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimiyim bureau tem nung agüjang.

Tepela Tasoba Anogo

Happy Birthday

1. **Tenüng** :
2. **Tasoba anogo**:
3. **Küm** : 4. **Class** :
5. **School** :
6. **Talidak** :
7. **Salem osang** :

NAI-A YA METETTER MA

ALIMA NUNG SAISAPONG STADIUM TULU KAR:

1. Narendar Modi Stadium (India)	132,000
2. Rungrado May Day Stadium (North Korea)	114,000
3. Michigan Stadium (USA)	107,601
4. Beaver Stadium (USA)	106,572
5. Ohio Stadium (USA)	102,780
6. Kyle Field (USA)	102,733
7. Neyland (USA)	102,455
8. Tiger Stadium (USA)	102,321
9. Darrell K. Royal-Texas Memorial Stadium (USA)	100,119
10. Bryant-Denny Stadium (USA)	100,077

SUDOKU # 6029 TELANGZUBA # 6028

8	1			5	4			3	8	1	4	6	2	9	5	7	
		7	9				6		4	9	7	5	8	1	2	6	3
2	6		7	8			9	1	2	5	6	7	9	3	1	8	4
	4		3			6	2	9	7	5	6	2	8	3	4	1	
9		6					1	5	6	4	3	1	7	9	8	2	5
3	2		6	7	1			8	8	1	2	3	4	5	7	9	6
		2			8	7	5	7	2	4	8	3	6	5	1	9	
7		3	4	2		1	8	1	6	9	2	5	7	4	3	8	
4			5			2		5	3	8	9	1	4	6	7	2	

OJANG LUTEP # 5575

MANTAGER :

MAA :

ÜNGRTSEM :

NGSENTO :

GATANETA :

IPA :

GINÜABA :

KTSÜINYAJI :

GAKAN :

NGTIBTOANG :

OJANG LUTEP TELANGZÜBA # 5574

INYAKTSÜ JEMBIR BILEMBA JAGI MAPA
MAOTSÜ ASÜNUNG INYAK TENZÜK TAJUNGBA

TAN HOPTA ATEMA - KOMA SÜLA ?

Q. Tazünger maliba aser tazüngertem aliyonga tazüngertem dang nungi tesayurtemang teimba aliba government school-tembo ajak shibang nunga koma süla ?



November 05, 2021 nü Ato kilonser, Narendra Modi-i Kedarnath nung aliba tekülem kidang sarasademba noksa nung angur. Tanü pai Kedarnath nung terenlok projects aika tenzüksüogo.

Nov. 10 nü Afghanistan atema India nung NSA senden amentsü

New Delhi/Yimposüi/ November 05 (Agencies): November 10, 2021 nü India-i Afghanistan linük dak sendakba nung National Security Advisors (NSAs) senden ka ayongzüka amentsü; Delhi Regional Security Dialogue on Afghanistan nung shilem agitsü atema Russia densema region nung aliba linük aika jaokogo. Iba senden ya NSA, Ajit Doval leniba nung amentsü. Iba ama senden ya tamalen Iran nung 2018 küm September aser 2019 küm December ita nunga menogo, saka

coronavirus wara aliba agi India nung tasembuba senden kera magiteti liasü. Pakistan nem-a iba senden nung adentsü tejaokba shidi agüja Pakistan National Security Advisor, Moeed Yusuf-a jaokogo aser pai iba senden nungji denra pai tang mezüing Delhi semdangtsü. Taküm Dushanbe, Tajikistan nung Shanghai cooperation organization NSA senden nung India NSA Doval aser Pakistan NSA Yusuf naprong aden saka tena jurila senden memeni liasü. Afghanistan nung tensa

tamajungba akümba atema linük aikati tebilemsü akaba mapang ka nung iba senden ayongzüker. November 10 nü ayongzüka senden nungji adentsü atema Russia aser Iran densema Central Asia nung aliba linük aikati telangzüba agütsüogo. Afghanistan nung tesünep alitsü aser security alitsü atema India-i temelung agüja inyakba ajanga linük aikati NSA level senden nungji adentsü melunger. Iba senden nung adentsü atema China aser Pakistan nata jaok saka tang tashi nung linük anapronglai telangzüba magütsü.

BJP Tir JP Nadda leniba nung BJP tongti lenirtem senden amen

New Delhi, November 05 (Agencies): November 7, 2021 nü Bharatiya Janata Party (BJP) national executive senden amentsü lia iba senden terenemshiba jenjang asadangtsü atema BJP Tir, JP Nadda leniba nung party tongti lenirtem senden ka menogo. Iba senden nungji organisation general secretary BL Santosh, General Secretaries Arun Singh aser Dushyant Kumar Gautam na, national media in-charge Anil Baluni, IT cell in-charge Amit Malviya aser Delhi nung party lenirtem aika aden. Osang angazükba agi, New Delhi nung Nadda'er kidang ghonda asem shi senden amenba mapang nung taruba

national executive senden atema nungdak aika jembiba. Tang coronavirus wara aliba ajanga national executive senden nungji committee nungji züngsem kar aser Delhi nung alir Union Minister kar dang adentsü, aser tanüingba party lenirtembo iba senden nungji video conferencing ajanga dang adentsü. November 7 nü anepdang 10:00 ako nung senden tenzüksü aser nikongdang 3:00 ako nungbosa senden tembangtsü. Senden telemsa ana kümer amentsü; mezüingbuba senden nungji JP Nadda-i jembitsü aser tanabuba senden nungji Ato kilonser, Modi-i jembitsü. Lenirtemi taruba national

executive senden nung benoka jembitsü atema onüktem shimogo. Kasa senden nungjisa linük nung coronavirus wara agi asürtem atema mangyimtsü. BJP-i sangdong ka ajanga, "National executive senden nungji taruba küm tetenzüklen Assembly elections agitsü aliba state tem atema jembitsü, iba sülen tarutsü nung inyaka aotsü atema party sentongtem yanglutsü," ta metetdaksü. BJP national executive committee tasenba nung züngsemtem taküm October 7 nü sangdonga liasü, aser iba committee nung Uttar Pradesh nung MP, Varun Gandhi aser tetsü, MP Maneka Gandhi nabo züingdokogo.



Hisar, November 05, 2021: Tawa Rajya Sabha MP, Ram Chander Jangra-i aluyimertem anema jembiba anema Hokolbarnü Hisar nung aluyimertemi longkak aيتدang pa indang gari raksatsüba noksa nung angur.

State temi totzü saru ajemtsü atema Centre-i GST agütsütsüla: Sharad Pawar

Pune, November 05 (Agencies): Central sorkari petrol aser diesel nung saru ajemba sülen Hokolbarnü NCP tongti lenir, Sharad Pawar-i, state sorkartemi gari totzü nung value-added tax (VAT) saru ajemtsü atema Centre sorkari state tem nem GST agütsütsüla, ta takhangba agütsü. Hokolbarnü Pune nung osangbenertem den jembidang Pawar-i, "Centre-i state ajak nem GST agütsü nungbo state sorkartemi petrol aser diesel nung VAT saru ajemtsü aser tanga schemes inyaktetsü," ta ashi. Bodhbarnü Union Finance Ministry-i petrol litre shia nung

saru sen 5 aser diesel litre shia nung saru sen 10 ajemogo. Tawa gari totzü jenjang kanga atuba sülen küm asem tsüingda tang mezüing Centre-i totzü jenjang ajemer. Pawar-isa, (Maharashtra) Deputy Chief Minister Ajit Pawar indang driver aser tanga staff tem dak coronavirus tashidak putetogo, ta metetdaksü. "Tekümdangtsü atema doctor temi Ajit Pawar dang anogo ishika kidang dang kija amongtsü tuyuogo," ta Pawar-i shisem. Tang Maharashtra nung Shiv Sena, NCP aser Congress teloktep sorkar lir.



Patna, November 05, 2021: Hokolbarnü Bihar Legislative Assembly nung JDU MLA ana- Rajeev Kumar Singh aser Aman Bhushan Hazari na tenangzüka agiba sülen tangokba noksa nung angur. Kasa noksa nung Chief Minister, Nitish Kumar-a angur.

TMC lenir Subrata Mukherjee süogo



Kolkata, November 05 (Agencie): Trinamool Congress nung lenir tain aser taoba mapang West Bengal nung Panchayat Minister, Subrata Mukherjee Kolkata nung aliba hospital ka nung temelungjang tashidak agi süogo; pa arrshi küm 75 liasü. Hokolbarnü West Bengal Chief Minister aser TMC tongti ,Mamata Banerjee-i Subrata asüba osangji sangdonga liasü. Pa state panchayat minister inyakba dang masü saka tanga ministry asem nunga inyaka liasü. Tan hopta pa angioplasty agia liasü aser yasüing (Brihostibar) 9:22 ako meta temelungjang tashidak agi asü, ta state minister Firhad Hakim-i metetdaksü. Chief minister Mamata lar kidang sarasadem agiba sülen lai SSKM Hospital semdang aser pa asüba osang sangdonga liasü. "Pa joko asenek den mali ta ni tang tashi mamangter. Pa ya

party nung kanga nendaka inyakba lenir ka liasü. Pa asüba ya ni atema takoksa tulu," ta lai ashi. Hokolbarnü tasümingji sorkar indang auditorium-Rabindra Sadan-i bener oa nisungtemi asür nem akhüm agütsü. Iba nungjagi tasümingji par kidangi bener aoba sülen tesüsa par yimdaki bener aotsü, ta Mamata-i metetdaksü. October 24 pa tangu junga mesashitetba sülen hospital-i anir ao aser November 1 nü angioplasty agia liasü. Temelungjang tashidak dak alia pa dak high blood sugar aser CoPD densema temang nung timtem aika liasü. Taoba mapang Ato kilonser, Indira Gandhi yimsüsüba mapang nung Subrata Mukherjee ya Congress lenir liasü. 2010 küm pai Mamata Banerjee-i aniba Trinamool Congress nung aden. Mamata-i, "Ni kü taküm nung takoksa aika ajuruogo, saka pa asüba yabo takoksa tulu. Pa ama mapa meranga inyaker ka ni joko mangutsü ta bilemer. Pa atema party aser par constituency (Ballygunge) ji pa tanela amai liasü," ta metetdaksü. "Pa asüba ya West Bengal atema takoksa tulu. Kü adianu ka asü ama ni bilemer. Anogo ishika tejaklen ni hospital nung pa semdanga pa den jembiba liasü. Pa asüba ya India nung yimtenren atema takoksa tulu," ta laisa ashi.



East Java, Indonesia nung aliba Batu yimti anasa Bulukerto yimtsüng nung ajungben tzümetsüng adoka lenmang makepsar aliba ajanga tetsür ka aoba noksa nung angur. Brehostibarnü Mount Arjuno tenemtsüng len aliba ayongtem mubanga tzü ayim aser East Java province nung yimtsüng pungo mubanga nisung aika asü.

Southwestern Niger nung yimtsüng ka amak, nisung 70 shi asü

Banibangou, Yimpoksüi/Nov. 05 (Agencies): Southwestern Niger nung prangbong bena alirtemi yimtsüng ka amakba mapang mayor ka densema nisung 69 tepset, ta sorkari sangdong ka nung ashi.

Iba lendong ya Burkina Faso aser Mali den arütsüdak Niger indang "tri-border" zone nung ataloka liasü, kong küm aika sorkar meyong sepaitem aser ISIL (ISIS) aser al-Qaeda den sendaktepa aliba telungpur teloktem tsüngta raraba tesem tiyong ka lir.

Mali den arütsü anasa Tillaberi region nung

Banibangou jila nungi kilometre 50 shi pilar iba jila indang mayor-i anir aliba telok ka dak telungpurtemi Mongulbarnü mita atar amak.

Iba lendong atalokba indang Brehostibarnü sangdongba mapang Interior Minister Alkache Alhada-i state television nung ashiba agi, iba lendong nung nisung 15 takum jenbu aser search operation tenzükogo.

Iba lendong ya Adab-Dab yimtsüng nung atalok, ta yangji alirtemi ashi. Motorcycle nung mena aliba defence forces tem dak Islamic State in the Greater Sahara (ISGS) züngsemtemi motorbike nung arua amak, ta

osang ajanga ashi.

Ano osang ka ajanga ashiba agi, Vigilance Committees ta nungja agüja aliba local defence force ka dak tenük yoker lendong ya agütsü. Lendong agütsürtemi par züngsemtem tasü mang bener Mali leni meyipa ao, ta osang ajangasa ashi.

Taküm southwest Niger indang arütsülen telungpur telok balalai civilian 530 dak tema takum samatsüogo, koba 2020 küm atalokba dang pungosü agi timba lir, ta Armed Conflict Location & Event Data Project (ACLEd) ajanga agütsüba data nung shia lir.

Indonesia indang Java asetkong nung tzümetsüng adok

Kota Batu, Yimpoksüi/Nov. 05 (Agencies): Indonesia indang asetkong tongtipa, Java nung tzünglu kanga sashia aruba ajanga ajungben tzümetsüng adoka nisung ti asü aser asem samar bushir, ta ketdangsürtemi ashi.

National Disaster Mitigation Agency ajanga Hokulbarnü ashiba agi, Brehostibarnü Mount Arjuno tenemtsüng ayongtem mubanga tzü adok aser lishitzü agi East Java province kübok Kota Batu yimti anasa yimtsüng pungo mubanga liasü.

Parnoki mezüngbo nisung 15 tzümetsüng agi pongzükler ao aser mapang tatsüka lir nisung pungo kumzüka liasü, ta ashi.

Jana-reja nungi nisung trok takum atsütet aser tekumzükertemi Batu nung nisung tasü mang trok aser Malang nung ana nguteta liasü.

"Tang tashi onoki samar aliba nisung asem bushitetsü meranger," ta agency indang mendenpuba, Abdul Muhari-i sangdong ka nung ashi.

Molushi aser jana-reja agi lenmang nokdanga teyari agütsüba maparen nung tetsükdaktsü agütsür.

National Disaster Mitigation Agency ajanga noksa aser video prokshiba nung apu raksar, nisung aliba ki aser garitem molushi agi meyibanger aliba nguogo.

Tang tashi ketdangsürtemi ki-o-jen raksaba aser nisung asü-amaba osangtem bendenba mapang lir aser tzümetsüng agi kongshir aliba tesemtem nungi nüburtem sorkari yangluba tejenokdak anitener, ta Muhari-i ashi.

Linük nung danga tesemtem nunga tzümetsüng kanga sashia adoka liasü, saka tang tashi nisung asü-amaba osangbo mali, ta agency ajanga ashi.

February ita tashi tzünglu tesashi maneni arutsü imlar, ta National Disaster Mitigation Agency ajanga ashi, aser ibai talisa La Nina tzüngsang mopung yimya nung shilem ka lir.

Indonesia nung meyi mapang teti tzümetsüng adoker aser anentsüh aludaktsü. Indonesia ya asetkong 17,000 agi akumba linük ka lir, kong nisung million aika tenem aser ali temu bushia tzümetsüng adokdak lipak nung alir.

Tekeraba nung sorkar tentettsü atema Sudan mitkari molunger

Khartoum, Yimpoksüi/Nov. 05 (Agencies): Sudan mitkar leniri pua aliba minister pezü chioktsü totuyuba agütsüba sülen tekeratiba nung sorkar tasen ka tentettsü United States den molungtepogo, ta Sudan sorkar meyong news agency ajanga ashi.

General Abdel Fattah al-Burhan-i US Secretary of State Antony Blinken den phone ajanga jembiba sülen pa indang office ajanga Brehostibarnü sangdong ka agüja liasü. Telok anati sorkar ka tentettsü asoshi tekeraba nung inyakteptsü molungtep, ta al-Burhan indang office ajanga ashi.

"Telok anati democratic transition lenmang yanglutsü nungdak, transitional government indang inyakyim renemtsü nungdak aser sorkar tentettsü asoshi tekeraba nung inyaktsü nungdak ta molungtepa liasü," ta pa indang office ajanga ashi.

US State Department odongtar Ned Price-i ashiba agi, phone nung jembidang Blinken-i al-Burhan dang tekeraba nung yimten yimsüsürtem mitkar tashi amshia sorkar atsüngdokba

mapang pua alirtem ajunga chioktsü ajungshia aser Ato Kilonser Hamdok tanaben office nung amentsü aser Sudan nung civilian-i aniba sorkar tanaben tenzükshitsü nungdak, ta shia liasü.

"Linüki jangraba ama tenzüktsü asoshi bendang aina oa aser linük telungzük nung mera ajak agitsü meranger. Sorkar tentettsüji tejangja," ta al-Burhan indang media adviser Taher Abouhaga-i Brehostibarnü ashi.

Ajisüaka Sudan yimtiba, Khartoum aser danga yimti tulutem nung Hokulbarnüa nüburtemi longkak aittsü imlar.

Mitkartemi tashiyim amshia sorkar atsüngdoker civilian politician lenirtem pua aser Hamdok kidang pua ayuba sülen yimtenren tsütsü makmak-shimak adokba tangatetep kati arudaktsütsü atema United Nations-i kanga meranga arur.

UN special envoy for Sudan, special representative Volker Perthes-i ashiba agi, jembishinü ajanga tashi lemsatempa yimsü asütsüsa teimla ka adokdaktsür aser yangji menden nungi atsüngdoker aliba ato

kilonser tanaben menden nung mendaktsütsü dena lir.

Saka pai telok anaprong tamendak-dak tali takangba makumdang tezüngzüktep ka hopta ishika tsüngta masü saka anogo ishika tsüngta yanglutsü ajungshia liasü.

October 25 nü mitkar tashi amshia sorkar atsüngdokba mapang al-Burhan-i transitional government anentsü aser sorkar ketdangsür aser yimten yimsüsürtem pua liasü.

Hamdok, shiba apuba sülen anogo ana tsüngta chiok aser tanüker yoka kidang pua yua lir, pa UN aser linük balala nungi diplomats tem den ajuruteptsü melar.

SUNA news agency ajanga Brehostibarnü ashiba agi, minister of information and culture, Hamza Baloul; minister of communications, Hashim Hasabel-Rasoul; minister of trade and international cooperation, Ali Gedou aser minister of youth and sports, Youssef Adam nungertem chioktsü telemtetba agiba osang ka al-Burhan-i sangdonga liasü.

Khartoum nungi osangbener kati ashiba agi,

minister pezü ya chiokogo saka ano minister aika pua lir. Ajidang masü ano activist aser lawyer tema tang tashi pua yua lir.

Mapa nungi anentsür aliba ketdangsürtem indang defence lawyer Moez Hadra-i ashiba agi, mitkartemi sorkar atsüngdokba mapang apuba sorkar ketdangsür aser yimten yimsüsür 100 shi nungi minister pezü ya densema lir. Parnok ya tesadang ka Khartoum aser tanüngba ya linük indang province balala nung prokshia yua lir südi, ta pai ashi.

Ketdangsür 25 shi sepaitem lenir anema nokdaktsü ajungmesoba nung tai tonglokja lir, ta pai ashi.

Parnok aika anepdang pei kidang nungi anizükler ao aser mejangjaba tesemtem nung ayu. Mitkar lenirtemi state news television headquarters mita bushi aser linük tesem ajungalen mobile aser internet communications tem shibangtsü. Nisung meyerijang aikati temai adoka longkak ait. Saka tang tashi internet service shibanga lir.

2019 küm yimsüsür anema nokdakba aser mitkartemi sorkar atsüngdokba anema

longkak aitba ketdangsür Sudanese Professionals' Association indang odongtar Sara Abdelgalil-i ashiba agi, taoba hopta longkak aiter aser mitkar anemer noklang aika pua lir. Kar samaogo, kar asüngdangya asü aser kar chiok.

Longkak aitba mapang noksa tangokba nungi jangjateta security forces temi pei kidang nungi itemji tashiyim agi pua bener aoba osangtem lir, ta Sudanese human rights lawyer Ali Agab-i ashi.

Osangtsüsang agitepba ajunga shibanga aliba ajanga nisung apuba mesüra samaba tejangja memeteter. Tesüiba anogo ter tsüngta kechisa atalokar memeteter, ta Abdelgalil-i ashi.

Sudan tensa indang jembishinütsü atema United Nations Human Rights Council pur Hokulbarnü ajungben senden ka amentsü lir.

UN Secretary-General Antonio Guterres-ia General al-Burhan den phone ajanga Brehostibarnü jembiba mapang, Sudan nung yimten mepetmesü tekeratiba nung angateteptsü asoshi mera agitsü ajungshia liasü.

MTV EMAs 2021 nung Ed Sheeran-i shilem agitsü

Yimpoksüi/November 05, 2021 (Agencies): Aruya aliba MTV EMAs 2021 sentong nung, Ed Sheeran, Imagine Dragons aser Yungblud nungeri shilem agitsü.

Kümshia ayonga agiba MTV EMAs sentong ya November 14, 2021 nü Papp László Budapest Sportaréna, Hungary nung agitsü renemdar aser 'Bad Habits' kentener, Dan Reynolds & co aser 'cotton candy' rocker, alt-pop stars Griff aser 'girl in red' nungeri EMAs sabang nung shilem agiba angutsü.

Iba award sentong nung Ed-i award pungo atema nomination ngua lir aser pai tasembenbuba iba sentong nung shilem agitsü. 2014 küm Glasgow nung iba sentong agiba mapang Ed-i shilem agia liasü. Iba sülen, 2015 küm-a Milan nung iba sentong agiba mapang, Ed-i host ama sentong ketdang asüba den külemi ken tenogo.

Imagine Dragons-ia iba sentong nung rapper J.I.D den külemi parnok indang ken tasen - 'Enemy' atentsü terenemba lir. Best Rock aser Best Group atema Imagine Dragons-i nomination ngua lir.

Nüngtugu ken - 'Thunder' atener teloki 2013 küm Amsterdam nung European Music Awards sentong nung tesüsa shilem agiogo.

'Best Alternative' nominee, YUNGBLUD, shiba tenüng

Dom Harrison lir, paia iba sentong nung 'Fleabag' ken atentsü. Kasa sentong nung, Best New nominee - Griff aser Norway nung artist 'girl in red', shirnoki Best Push artist nung nomination angu, tenati taküm EMAs nung mezüng shilem agiba angutsü.

Taoba mapang, iba sentong nung shilem agitsü asoshi artist tenüng kar sangdonga liasü. Parnok rongnung Maluma, Måneskin, Kim Petras aser host Saweetie den World Stage headliner OneRepublic dena lir. Sentong atema shilem agitsüpur kar aser presenter tenüngtem yakta sangdongtsü.

Taküm MTV EMAs Award sentong nung Justin Bieber-i nomination timba ngua lir. Justin-i nomination 8 tashi ngua lir.

Arishi küm 27 tain Justin indang nomination rongnung Best Artist dena lir aser iba title atema pai Doja Cat den tokteptsü. Doja-a nomination 6 ngua lir.

Tanga category nung, Justin-isa Ed Sheeran, Lady Gaga, Lil Nas X aser The Weeknd nung den tokteptsü.

Nüngtugu ken 'Baby' ken atensang Justin-i Best Pop category nung Ed aser Doja Cat den tokteptsü. Iba category' nung BTS, Dua Lipa, aser Olivia Rodrigo nungeri nomination ngua lir. Best Song nunga Justin-i nomination ana

ngua lir.

Daniel Caesar aser Giveon den külemi atenba 'Peaches' track aser The Kid LAROI's 'STAY' atema Justin-i double category nung nomination nguogo.

Ajisüaka, category rongnung Pop category nung pai Doja Cat den kanga meranga tokteptsüsa akümer. 'Kiss Me More' atema iba category nung Doja-i nomination ngua lir.

Ed indang 'Bad Habits' ken, Olivia indang 'Drivers License' aser Lil Nas X indang 'MONTERO (Call Me By Your Name)' ken ajanga nomination ngua lir.

Best Rock category nung Coldplay, Foo Fighters, Imagine Dragons, Kings Of Leon, Måneskin aser The Killers nungeri nomination nguogo. Ano külen, Calvin Harris, David Guetta, Joel Corry, Marshmello, Skrillex, aser Swedish House Mafia nung rongnung kati Best Electronic award angutsü.

Iba sentong nungsa Biggest Fans prize agütsütsü terenemba lir, kong shortlist nung Ariana Grande, BLACKPINK, BTS, Justin, Lady Gaga aser Taylor Swift nung dena lir.

2021 MTV EMAs sentong ya Deobar (14.11.2021) aonung 9:00 (GMT) ako meta linük 180 nung MTV nung live sayutsü.

'Boys of Summer' nung Mel Gibson denogo

Yimpoksüi/November 05, 2021 (Agencies): Actor Mel Gibson-i 'Boys of Summer' nung shilem agitsü. Iba indie fantasy adventure nung arishi küm 65 tain Mel-i Mason Thames den külemi shilem agiba angutsü.

Iba project ya David Henrie-i direct asütsü. 'Wizards of Waverly Place' sentong nung David-i actor ka ama shilem agiba ajaki jangjaa lir.

Cornelius Uliano aser Bryan Schulz nati 'Boys of Summer' atema script zülutsüogo. Nickel City Pictures aser Novo Media Group atema Mark Fasano aser James Henrie nati iba project produce asütsü.

Taruba ita North Carolina nung iba project atema production maparen tenzüksü sentong lir.

Iba project dak alaka, Mel-

isa thriller 'Hot Seat' nung shilem agiba angutsü. Iba film atema 'Braveheart' star Mel-i producer Randall Emmett aser George Furla na den tasembenbuba longjemtsü.

Producer Randall aser George nati ashiba agi, "Mel den iba ya movie tasembuba asütsü aser pa ama nüngtugu artist den longjemer project tasen ka nung inyaksü asoshi yongyar."

Kohima nung Naga nung atema...

(Tapak 5 nungi...)

Organizing Committee Convenor, Rev. Velavoyi Keyho-i sangdong ka ajanga, iba crusade nung adentsü atema Naga nung yimtenren telok kecha mebendangi ajak jaoker; Minister tem, MLA tem, party balala nung inyakerkem densema yimtenren lenirtem ajak jaoker, Arogo lenirtem aser lokti tentet balala nungi lenirtem ajak jaoker, ta metetdaksü.

Iba crusade nung adentsü atema Nagaland nung aliba prayer house aser prayer centers ajak nungi züngsem asemsembo adentsüla; anenzüksü aser chiyungtsü ajak anepalutsütsü. Nisung 300 nungi 500 tashi atema tanenzükdak achaayangogo, ta Rev. Keyho-i metetdaksü.

Organizing Committee züngsem, Wt. Thungdeno Mozhui-i, iba crusade nung teindokba sen ajakji Naga Shisha Hoho Prayer Centre-i agütsütsü; iba crusade ya Tsüngremer sentong ka lir, kechiyong coronavirus wara-a azüoktetogo, ta ashi.

Laisa, tesüiba mapangtem nung aibelenba ajak atema tatok meshitsü aser Tsüngremi shilem agir ajak moatsüba den külemi Naga nung ajak dang tai atoksü amanger, ta ashi.

Iba crusade nung o jembirtemji H. Rokopra Mekro, Asst. Pastor, Koinonia Baptist Church, Rev. Velavoyi Keyho, Pastor, Phezoucha Nagamese Baptist Church, Kohima aser Nangba Konyak (Missionary)

Miracle Healing Prayer Ministry, Dimapur nung asütsü aser Call of God Ministry, Kohima-i tekülem aser tetushi lenitsü.

Organizing Committee-i tejaoker ajak dang apen-süoshi bener arutsü mepishia metetdaksür, saka chiyungtsübo sentong tayongertemi agütsütsü.

Sentong nung adentsüpurtem November 12 anüngdang 12:00 ako tashi nungbosa Prayer Centre tonga arua registration agitsüla.

Anogo asemnü sentong nung sarasadem sentonga balala ayongzüka agitsü, ta parnokisa m e t e d a k t s ü o g o . Metetpelanüba lira phone no. 6909784167 ajanga tongteprateptsü akok.

LONGSA SENSO MORIA MISSION

Hon Jubilee Mung Sentong

Omen: "Sentsüwangshi Nüchi" 2 Kor. 3:17



Anogo : November 13-14, 2021

Onük Jembirtem

Wt. Mapula Missionary, IEF

Rev. Dr. Mar Pongen,
Executive Secretary, ABAM, Impur
Rev. Dr. Alemrenba Pastor, DABA

METETDAKTSÜR: Longsa Senso nübur aser anükapang ajak iba Hon Jubilee nung pelashishia jaoker.

Robert Downey Jr aser Matt Damon na longjemer

Mumbai, Yimpoksüi/November 05, 2021 (Agencies): Christopher Nolan indang taruba film - Oppenheimer cast rongnung Hollywood superstar Robert Downey Jr aser Matt Damon na anisemogo.

'The Hollywood Reporter' sangdong ka ajanga angazükba agi, Oppenheimer nung, taoba mapang aniokba cast Cillian Murphy aser Emily Blunt na den Robert aser Matt nati külemi shilem agiba angutsü.

Universal Pictures indang project ya J Robert Oppenheimer indang taküm otsü nung ajemdaker yangluba film ka asütsü.

Oppenheimer atema, Christopher Nolan den Marvel Cinematic Universe (MCU) movie star rongnung Robert Downey Jr aser Oscar takok angur Matt Damon nati mezüng shilem agir asütsü.

Iba project dak sendakba nung, character role indang osang tejangja ano temai madok.

Murphy-i J Robert Oppenheimer aser Emily

Blunt-i pa (Oppenheimer) kinungtsü Katherine ama shilem agiba angutsü.

Taoba mapang, Cillian Murphy aser director Nolan nati film asem - Batman Begins, Inception aser Dunkirk nung külemi inyakogo.

Oppenheimer ya Pulitzer Prize takok anguba kaket 'American Prometheus: The Triumph and Tragedy of J Robert Oppenheimer', koba Kai Bird aser Martin J Sherwin ajanga adok, iba kaket nung ajemdaker yangluba otsü ka asütsü.

Christopher Nolan-i iba film atema script zülutsü aser pai direct asütsü. Kasa mapang Nolan kinungtsü Emma Thomas-i Atlas Entertainment indang Charles Roven den longjemer iba film produce asütsü.

2020 küm sayaba 'Tenet' ya Nolan indang film tesübuba liasü. Iba film nung tanga cast rongnung John David Washington, Robert Pattinson, Kenneth Branagh aser Elizabeth Debicki nungeri tongti shilem agiba nguogo.

GPRN-i asükhu lemsatep

Dimapur, Yimpoksüi/November 5 (TYO): Government of the People's Republic of Nagalim (GPRN)-i sangdong ka ajanga, Kangkuba Maram asüba osang angazüka mang ayimba lemsatepogo.

Kangkuba Maram ya Maram Thangal Sub-Region kübok Mathak Sangai yimtsüng nungi lir aser pa November 3 nü temulungjang mapa minyaki küma asü.

Pa Naga nung tenzüksü atema 1968 küm züngoksem aser mapa nungi anener liasü. Iba sülen pa NSCN/GPRN nung 2019 küm August ita Razou Peyu ama aden aser masü tashi Naga nung

bendanga agüja tenzüko.

Pa melener angutsü tasak asütsü aser pai Naga nung atema taküm tenla agüja bendanga tenzüka atema pa tenüng Naga nung puti otsü nung teti atema mangaoka ayutsü aser teti menungra bilemtetsü.

NSCN/GPRN-i Kangkuba Maram'er kinungertem den asükhu lemsateper aser mangyim jashi mapang tulusang Tsüngremi parnok nem anisüngzüka agüjang ta sarasademtsür. Pa tanüla teti tatem makadak anisüngzükdangjang ta sarasademtsür, ta MIP, NSCN/GPRN-i sangdong ka ajanga lemsatep.

8buba Kohima District Open Volleyball Tournament 2021 asayatsü

Kohima, Yimpoksüi/ November 05, 2021 (TYO): Kohima District Volleyball Association (KDVA) akhüm nung, November 10 nungi 12, 2021 tashi Kohima Local Ground nung 8buba Kohima District Open Volleyball Tournament 2021 (Men & Women) asayatsü. Iba asayamung "Transcending through sports" omen nung ajemdaker ayongzüksü, ta sangdong ajanga metetdaksü. Bodhbar (10.11.2021) anepdang 11:00 meta Kohima Local Ground nung iba asayamung lapokba sentong agitsü, kong Akumla Chuba, director, youth resources &

sports, Nagaland tongti tesemdanger ama jaoktsü. Iba asayamung nung shilem agitsü asoshi entry form agitsütsü atema Hombar (08.11.2021) tashi anogo atsülangtsür. Entry form tem Sports World, Main Town, Kohima aser Star Sports, near Southern Angami Sumo Parking, BOC Kohima nung angutsü. Maneni, November 8 anepdang 10:00 ako meta Kohima Local Ground nung senden ka ayongzüksü. Anungji KDVA ground management committee pur dang iba senden nung adentsü asoshi metetdaksür.

*** 8buba Kohima District Open Volleyball Tournament 2021 atema senpet vamai alitsü:**

- Men category
1st- Rs. 50,000
2nd- Rs. 25,000

- Semi finalists- Rs. 5000 each
Best Setter- Rs. 2000
Best Spiker- Rs. 2000
Best Coach- Rs. 2000

- Women category
1st- Rs 30,000
2nd- Rs. 15,000

Semi finalist- Rs. 5000 each
Best Setter- Rs. 2000
Best Spiker- Rs. 2000

Syed Mushtaq Ali Trophy: Nagaland-i Vidarbha makok

Dimapur, Yimpoksüi/ November 05, 2021 (TYO): Hokolbarnü, Vijayawada kübok ayongba Syed Mushtaq Ali Trophy T20 Plate group nung Vidarbha aser Nagaland na asaya liasü. Iba asaya nung, taoba mapang Ranji asayamung takok angur telok Vidarbha-i Nagaland madak wicket pungo agi takok nguogo.

Toss koka Nagaland team-i batting shim, kong batter temi Vidarbha team bowling aser fielding azüoka asayatsü maongka tajung mengutet. Over 20 nung Nagaland team-i run 115 yanglutet aser parnok 8

out süadok. Taoba mapang Rajasthan wicketkeeper-batsman Chetan Bist, shiba Nagaland team nung asayadar, pai kanga meranga ball 46 nung 4' ka aser 6' ka densema run 44 yanglua liasü. Ajisüaka, innings tatem tashi Bist den yaritepa asayatsü asoshi külem team nung batter temi run aika meyangluteti out süadok. Iba den külemi Nagaland nungi batter asem tashi run out süadokba yong team pur kanga akoksadok. Chetan dak alaka, team atema Jonathan Rongsen-i run 35 yanglutet. Nagaland nungi

bowler Khrievitso Kense-i wicket ana agi (2/27). Tanabuba innings nung, latetja aliba over atemtsü ball 13 anünga lia, over 17.5 nung Vidarbha-i iba asaya koktet. Asayar tejen Ganesh Satish (39) aser Akshay Karnewar (35 not out) nati Vidarbha team atema junga asayaogo. Tang, plate group nung, Vidarbha-i asaya ana takok anguba sülen, parnok temaba jenjang tongtetogo. Kasa group nung 'net run-rate' ajanga Tripura aser Meghalaya nati tanabuba aser tasembuba jenjang tongteta lir.

T20 World Cup: New Zealand-i run 52 agi Namibia kokogo



Sharjah, Yimpoksüi/November 05, 2021: New Zealand bowler Jimmy Neesham-i Namibia indang opener Michael Van Lingen out sütsüba sülen külem team puri pa den pelatepba noksa nung angur.

Sharjah, Yimpoksüi/ November 05, 2021 (Agencies): Hokolbarnü, T20 World Cup asayamung nung, New Zealand-i Namibia madak run 52 agi takok nguogo. Iba takok ajanga Kane Williamson'er teloki semi-finals tongteta asayatsü asoshi lenmang sadema lapoker. Group 2 nung New Zealand team-i Afghanistan ajangteta tanabuba jenjang tongtetogo.

Toss agiba sülen, New Zealand nem batting lemzüksü aser parnok run 87 nung wicket 4 out ser liasü, saka Glenn Phillips (39 not out off 21 balls) aser James Neesham (35 not out off 23 balls) nati junga asayaba yong New Zealand puri run 163/4 yanglutet.

Namibia opener Stephan

Baard (21 off 22 balls) aser Michael ven Lingen (25 off 25 balls) nati (opening wicket) run 47 yanglua liasü. Ajisüaka, New Zealand den tokteptsüsa tanünga batter temi junga masayatet. Kiwis atema James Neesham (1/6)-i mezüng wicket agia liasü. Pai opener Ven Lingen out sütsü. Iba sülen, Mitchell Santner (1/20) aser Ish Sodhi (1/22) napronglai Namibia batter azüoka asaya.

Tim Southee (2/15)-i David Wiese (16 off 17 balls) out sütsür sülen, Namibia pur teimla samadok. Innings tatemlen Trent Boult (2/20)-ia külem team pur nungitta asayaogo.

Over 20 nung Namibia-i run 111 dang yanglutet aser parnok 7 tashi out süadok.

Iba asaya mezüng innings nung, New Zealand pur wicket pungobuba nung Phillips aser Neesham nati ball 36 nung run 76 bendenloktsü. Phillips-i 4' ka aser 6' asem zükloktsü. Kasa mapang Neesham-ia 4' ka aser 6' ana züklokja liasü.

Iba innings atemtsü over 3 anünga lia, Courtesy Phillips aser Neesham nati Kiwis atema run 53 yanglutet.

New Zealand opener Martin Guptill (18) over pungobuba nung out süadok. Aji masüadang, over pezüububa nung, Johannes Smit ball nung Daryl Mitchell (19)-i mezüng boundary zülöktsütsü aser over pezü sülen Kiwis pur run 30/0 liasü.

Wiese-i Guptill aser Scholtz-i Mitchell out sütsü. Iba mapang Kiwis pur run 43/2 yanglur liasü. Iba sülen, Skipper Kane Williamson (28) aser Devon Conway (17) nati run 38 yanglutet.

Over 13buba nung Williamson ya Namibia captain aser leg-spinner Gerhard Erasmus (1/22)-i out sütsü. Idangji, wicket tasembuba nung New Zealand 81 yanglur liasü, saka tatsüka dang lir Conway run out asüba ajanga New Zealand pur run 87 nung wicket pezüububa tukadok.

Iba sülen, over 18buba nungi Phillips aser Neesham nati Kiwis atema tongtibang run aika bendenloktsü.

World Test Championship: India-i South Africa nung Test 3 asayatsü

New Delhi, Yimpoksüi/ November 05, 2021 (Agencies): Hokolbarnü, Cricket South Africa (CSA)-i, December-January 2021-22 tsüngda India team-i South Africa nung cricket format ajunga asayatsü terenemba lir, ta sangoktsü.

Anogo 45 tashi South Africa tour mapang, India team-i Tests 3, ODIs 3 aser T20Is 4 asayatsü.

Asaya asem test series ya Johannesburg nung December 17, 2021 nungi tenzüka asayatsü. December 26-30 tashi Pretoria nung Boxing Day test ka aser sangküm January 3-7 tashi Cape Town nung New Year's match asayatsü. Item Test asaya mapang, asaya reprangdaksütsü atema vaccine agir alirtem tatakzük melatsü imlar.

Item Test match ajak World Test Championship (WTC) 2021-23 season indang shilem ka ama asütsü.

"South Africa nung India team tanaben jaoktsü asoshi CSA yongyar, koba 1991 nung

*** Tour schedule**

- First Test: December 17-21; Wanderers, Johannesburg
- Second Test: December 26-30; Centurion Park, Pretoria
- Third Test: January 3-7; Newlands, Cape Town
- First ODI: January 11; Boland Park, Paarl
- Second ODI: January 14; Newlands, Cape Town
- Third ODI: January 16; Newlands, Cape Town
- First T20I: January 19; Newlands, Cape Town
- Second T20I: January 21; Newlands, Cape Town
- Third T20I: January 23; Boland Park, Paarl
- Fourth T20I: January 26; Boland Park, Paarl

T20 World Cup sülen cricket nungi anentsü: Dwayne Bravo

New Delhi, Yimpoksüi/ November 05, 2021 (Agencies): West Indies star all-rounder Dwayne Bravo-i tang asaya aliba ICC Men's T20 World Cup asayamung temer sülen, international cricket nungi anentsü osang jangjatsüogo.

2006 küm Auckland nung West Indies aser New Zealand na tsüngda T20 asayamung nung mezüng asayaba mapang nungi Bravo-i West Indies atema T20s 90 nung asayaogo.

T20 asaya 90 nungi Bravo-i average 22.23 aser strike rate 115.38 nung run 1,245 yangluogo.

Medium fast bowler ka ama, Bravo-isa T20Is asayamung nung wicket 78 out süja lir. 2012 aser 2016 küm West Indies-i T20 World Cup akokba mapang team nung Bravo asayaogo.

Tang ICC World Cup T20 asayamung nung, Bravo-i group game pezü nung run 16 yanglua lir aser wicket 2 dang agia lir.

International Cricket nung tanaben ajemoka asayaba sülen South Africa indang mezüng India tour küm 30 ajungtsü. Iba tour ajanga BCCI den tesendaktep tajungba yanglur," ta CSA Director of Cricket Graeme Smith-i ashi.

Limited over match atema India team Western Cape nung amungtsü. Sangküm January 11 nungi 16 tsüngda Paarl aser Cape Town nung One-Day International match asem asayatsü aser kasa tesem ana nung January 19 nungi 26 tashi T20 pezü asayatsü terenemba lir.

"Cricket South Africa den alima tesem balala nung nüburtem den longjemer Mahatma Gandhi sor küm 152 ajungba anogomung nungtem nung, iba tour ya asayatsü. Tesüiba küm nungi CSA wadang nung nungitta aser yariba atema onoki India dang kanga pelar. Iba tour takok ngua ayongzüksü asoshi imlaa atar," ta CSA Acting Chief Executive Officer, Pholetsi Moseki-i ashi.

BILEMDANGANG

"Shisamakari pei jenjang aser rongsen nung asüküma bilemer."